



REPUBLIKA E SHQIPËRISË  
KUVENDI

MIRATOHET

KRYETARI

Gramoz RUÇI



## REZOLUTË

### PËR VLERËSIMIN E VEPRIMTARISË SË KOMISIONERIT PËR TË DREJTËN E INFORMIMIT DHE MBROJTJEN E TË DHËNAVE PERSONALE PËR VITIN 2017

#### **Kuvendi i Shqipërisë vlerëson:**

- Rolin e Komisionerit për të Drejtën e Informimit dhe Mbrojtjen e të Dhënave Personale, si institucion i pavarur dhe autoriteti përgjegjës që mbikëqyr dhe monitoron të drejtën e informimit dhe mbrojtjen e të dhënave personale, në përputhje me ligjin nr. 119/2014 “Për të drejtën e informimit” dhe ligjin nr. 9887, datë 10.3.2008, “Për mbrojtjen e të dhënave personale”, të ndryshuar;

- Rolin aktiv të Zyrës së Komisionerit në rritjen e ndërgjegjësimit të Autoriteteve Publike për detyrimet e tyre mbi hartimin dhe publikimin e programeve të transparencës dhe dhënien e informacionit publik;

- Angazhimin e Zyrës së Komisionerit për rritjen e numrit të inspektimeve dhe verifikimit të rekomandimeve në sektorë të ndryshëm që mbledhin e përpunojnë të dhëna personale;

- Zhvillimin e trajnimeve lidhur me zbatimin e ligjit për mbrojtjen e të dhënave personale për kontrolluesit publik dhe privat.

#### **Kuvendi i Shqipërisë konstaton se gjatë vitit 2017:**

- Zyra e Komisionerit ka kryer inspektime pranë Autoriteteve Publike, me qëllim kërkimin e informacionit lidhur me publikimin e programeve të transparencës, caktimit të koordinatorëve për të drejtën e informimit dhe publikimin e regjistrat të kërkesave dhe përgjigjeve.

- Ka rënie të numrit të ankesave pranë Zyrës së Komisionerit krahasuar me një vit më parë në lidhje me të drejtën për informimit, tregues ky që lidhet edhe me rritjen e përgjegjshmërisë së autoriteteve publike në dhënien e informacionit të kërkuar.

- Është rritur numri i ankesave të drejtuara nga qytetarët pranë Zyrës së Komisionerit në krahasim me numrin e ankesave të depozituara nga organizatat e shoqërisë civile lidhur me garantimin e të drejtës për informim.

- Është rritur numri i ankesave nga qytetarët, në zbatim të ligjit nr. 9887, datë 10.3.2008, "Për mbrojtjen e të dhënave personale", si një tregues i ndërgjegjësimit të tyre mbi të drejtat që i garanton ky ligj.

- Zyra e Komisionerit ka vazhduar me monitorimin dhe mbikëqyrjen e përpunimit të të dhënave personale, në kontrollues publik dhe privat, kryesisht në sektorë të mëdhenj, duke dalë edhe me rekomandime unifikuese në sektorë të veçantë.

- Është rritur numri i hetimeve administrative me iniciativë të Zyrës së Komisionerit në sektorë të ndryshëm.

- Është rritur roli i Zyrës së Komisionerit në dhënien e mendimeve ligjore për projektakte ligjore e nënligjore, me synim përputhshmërinë e legjislacionit të brendshëm me ligjin për mbrojtjen e të dhënave personale.

### **Kuvendi i Shqipërisë, për vitin 2018, kërkon nga Zyra e Komisionerit:**

- Të angazhohet maksimalisht si institucion përgjegjës për zbatimin e detyrimeve që rrjedhin nga VKM "Për krijimin e bazës së të dhënave shtetërore, regjistri elektronik i kërkesave dhe përgjigjeve për të drejtën e informimit".

- Të rrisë hetimet proaktive me iniciativë lidhur me procesin e mbledhjes dhe përpunimit të të dhënave personale të qytetarëve nga kompanitë e mëdha publike dhe private.

- Të rrisë masat administrative për shkelje ligjore të konstatuara, për mungesën e programeve të transparencës, regjistrin të kërkesave dhe përgjigjeve dhe caktimin e koordinatorit, me fokus të veçantë ministritë dhe organet e pushtetit qendror.

- Të angazhohet për pasurimin e programeve të transparencës së institucioneve publike dhe jopublike, me informacione që kanë të bëjnë me objektivat për zhvillimin e qëndrueshëm, në kuadër dhe të rezolutës së Kuvendit të dhjetorit 2017 "Për objektivat e zhvillimit të qëndrueshëm të agjendës 2030 të shteteve anëtare të Kombeve të Bashkuara".

- Të angazhohet për hartimin e projektakteve normative që përafrojnë plotësisht dispozitat e paketës së re ligjore të BE-së në fushën e mbrojtjes së të dhënave personale: Rregulloren (BE) 2016/679 të Parlamentit Europian dhe të Këshillit, të datës 27 prill 2016 (Rregullorja e Përgjithshme për Mbrojtjen e të Dhënave Personale) dhe Direktivën (BE) 2016/680 të Parlamentit Europian dhe të Këshillit, të datës 27 prill 2016 (Direktiva për mbrojtjen e të dhënave të personave fizikë gjatë procesit penal).

- Të rrisë kontrollin dhe hetimet administrative lidhur me respektimin e së drejtës për informim dhe mbrojtjes së të dhënave personale.

- Të hartojë dhe të miratojë modelin e programit të transparencës për organet e vetëqeverisjes vendore.

- Të monitorojë në vazhdimësi mbikëqyrjen e zbatimit të ligjit nr. 9887, datë 10.3.2008, "Për mbrojtjen e të dhënave personale" mbi plan tematik, duke synuar unifikimin e praktikave në sektorë të ndryshëm.

- Të monitorojë zbatimin e rekomandimeve/urdhrave të dhëna nga Zyra e Komisionerit, me fokus institucionet publike.

- Të rrisë aktivitetet ndërgjegjësuese me autoritetet publike, qytetarët, kontrolluesit publikë e privatë, shoqërinë civile, për të dy fushat e veprimtarisë që mbulon Zyra e Komisionerit, të dhënat personale dhe të drejtën e informimit.

- Të forcojë kapacitetet institucionale nëpërmjet trajnimeve dhe bashkëpunimit me organizmat ndërkombëtarë.

Miratuar në datën 5.4.2018